

Kalata gwa Juuta Isyakulongosya

Kalata ujũ umpimba aasimbiigwe na Juuta, ujũ aali jũmo mbaamyabo baa Jesu. Aabasimbiile kalata ujũ abiiitiki bamo, aba baataamigwaga fiijo ni manyisyo isya bamanyisi baa butungulũ. Abamanyisi abo bandalaga imanyisyo isya ipyana lya Kyala, nũ kubasofya abiiitiki ukutuugala nkajiilo akabiibi. Juuta aasimbile ififwanikisyo fingi ukufuma nDwitikano ulukulu, ukubakasya abiiitiki ukuumilila mbwanalooli bwa Kyala na mu Ndũmi iNunu ijaa Jesu Kilisiti, iji baajipiliike ukufuma kũ batumigwa baa Jesu.

Uluponio

¹ Kalata ujũ afumile kũmyangũ une Juuta, ne mbombeli gwa Jesu Kilisiti, ne gwamyabo gwa Jaakobo. Ngũbasimbila umwe mwesa mwe musunguliigwe na Taata Kyala, mukutuugala ndũgano lwake, mukulindililigwa kanunu mpaka bo ikwisa Jesu Kilisiti.

² Kyala abongelepo ulupaakisyo, ulutengaano nũ lugano kũ bwingi.

Ukujilwila iNdũmi iNunu

³ Bakũndwe bangũ ndwitiko, naaliijũulile fiijo ukuti mbasimbile isya bupoki ubũ bukutubiika twesa mbũliilani. Looli naagile ukuti

ngulondigwa ukubasimbila kalata ujũ, ugwa kubapyelesya iisyũ limolyene ili. Mujilwilege iNdũmi iNunu iji mwajambiliile ukufuma kwa Kyala kamokeene, umwe na bandũ baake boosa! Mujilwilege!

⁴ Nikubasimbila kalata ujũ paapo abandũ bamo biijingiisye kubutiitũ, nũ kwijongaania na nuumwe. Abandũ abo batikũntiila Kyala, bikwinogona ukuti biitikisiigwe ukulogwa paapo bambiliile uluhobokelo ukufuma kwa Kyala. Ulo bankaaniile Jesu Kilisiti uNdongosi uNkulũmba, uNtwa gwitũ. Looli ukufuma liijolo sisimbiigwe ukuti Kyala ikwisa kubalanga kunongwa jaa mbiibi isyo.

Ififwanikisyo fingi ifya kulongigwa

⁵ Ngulonda ukubakũmbũsya, na paapo musimeenye kanunu isi syosa. UNtwa aabapokile mbũtũlanongwa aBanyaisilaĩli ukufuma mu ngũbilo syabo nkiisũ kya Misili, looli piitaasi aabapyutile abandũ baake aba baakaanile ukũmmwitika.*

⁶ Mukũmbũkege boope abandũmi bala, aba uNtwa abapinyile mu ngiisi ni minyololo gya bwila na bwila. Kangi aba uNtwa ikũbatiima ukuti balongigwe iisikũ ilya kũmmaliikisyo, paapo baabwilile ubũkulũmba bwabo, nũ kubũleka ubũjo bwabo.

⁷ Kangi mubakũmbũkege abandũ abaa ntwaja utwa mu Sotoma na Gomola, na bala abaa ntwaja utũpalamani. Kyala aabapeele ulũfundo abenekaaja abaa ntwaja tũla ulwa kũkosigwa

* **1:5 1:5** Bala kalata gwa Imbalilo 14:26-35; 26:64-65.

mmooto ugwa bwila na bwila, paapo baalog-waga, nu kunyonywa ukulogwa ni mibili igi gikaja gya bandu. Ufundu lwabo lukubasoka abandu boosa.†

⁸ Na ulu abandu aba bikwijingisya kumyinu bafwene nabo. Bikwijumbika ukuti bambiliile indagilo ukufuma kwa Kyala. Ulo bikuginyasya imibili gyabo, bikubukaana ukulumba ubwa Kyala nu kufituka ifipeligwa ifi fikatusgala kumwanya.

⁹ Looli joope Mikaili ugwandami ukulumba bo ikujobesania nu kukaanikana na Seetano, isya kwegu umfimba gwa Moose, akaagelilepo ukunsitaaka Seetano kunongwa jaa maheelu gaake. Looli aajobile aatile, “Untwa Kyala juuho akukemele!”‡

¹⁰ Looli abandu aba kufituka fyosa ifi bakafimanya. Akabalilo aka bikusibomba isyo kisita mahala, bo ulwa finyamaana ifi fikaja na mahala, aabikupyutigwa na Kyala.

¹¹ Ahili! Bajikongile injila jaa Kaini ijaa kubomba imbiibi. § Bakongile akajiilo kaa Balamu, uju aabasyobile abandu kunongwa jaa ndalama.* Aabikupyutigwa paapo bikusambuka bo ulwa Koola, uju aapyutiigwe kunongwa jaa kusambuka.†

¹² Abandu aba boonangi bo mubungeene pakwipuuta pamopeene nu kumenya ikisyese ndugano. Bikulya itolo kisita soni. Abeene

† **1:7 1:7** Bala kalata gwa Ubwandilo 19:1-24. ‡ **1:9 1:9** Bala kalata gwa Sakalija 3:2. § **1:11 1:11** Bala kalata gwa Ubwandilo

4:1-16. * **1:11 1:11** Bala kalata gwa Imbalilo 22:4-35; 31:16.

† **1:11 1:11** Bala kalata gwa Imbalilo 16:1-35.

bali bo abatiimi aba bikwipaasya beene itolo. Kangi ngati mabingo aga gikugutigwa nu mbelo kisita kutwala ni sajo sya fula.‡Kangi ngati mipiki igi gikaja ni seke akabalilo kaa ntondolo, ginyukuliigwe gyosa gyumile. ¹³ Imbombo syabo isya soni, sili bo untotoofula ugwa majiga amakali aga gikumalikila kumbali kwa sambu. Sifwene bo indondwa isi sikabagila ukututwala. Kyala ababiikiile ubajo ubwa mu ngiisi inywamu bwila na bwila.

¹⁴ Enoki, umwisukulu ugwa buhaano na bubili ukufuma kwa Atamu,§ aajobile ubukunguluka ubwa bandu aba, aatile, “Keeta, uNtwa ikwisa pamopeene na bandami baake abiikemo abingi fiijo,

¹⁵ ukuti abalonge boosa, fiijo ukubafunda aba bakantiilaga Kyala. Ikwisa kubalonga kunongwa jaa mbombo syabo syosa isi babombile kisita kuntiila Kyala, pamopeene na masyu goosa amabiibi agaa kummwilaamwa paapo bakantiilaga.”*

¹⁶ Abandu aba bikwibuneesya nu kwililiisya, bikufikonga ifinyonyo fyabo ifibiibi. Bikwituufya fiijo nu kubatuufya fiijo bamo, ukuti bakabemo.

Ubugunguluka bwa batumigwa

¹⁷ Looli umwe bakundwe, mukumbukege isi baajobile abatumigwa† baa Ntwa gwitw Jesu

‡ **1:12 1:12** Bala kalata gwa Isya Mbupingamu 25:14. § **1:14 1:14** Bala kalata gwa Ubwandilo 5:21-24. * **1:15 1:15** Ubajobi ubu bufumile mwa baakalata bamo aba baasimbiigwe na Bajuta, bakajamo mu Bibilia. † **1:17 1:17** *Abatumigwa* Bala ku Isyakulingaania.

Kilisiti.

¹⁸ Baatile, “Amasiku gaa kummaliikisyo aabikwisa abandũ abaa kwila, aba bikukonga ifinyonyo fyabo ifibiibi.”

¹⁹ Abandũ aba bikubatikania. Bakaja na Mbepo gwa Kyala, looli indumbula syabo sikusyala pakiisu apa.

Ƴkubatũla aboonywa

²⁰ Looli umwe bakundwe, mwimege kanunu ndwitiko lwinu, ulu lwikemo fijo, kangi musũmege ku maka agaa Mbepo Mwikemo.

²¹ Mwendelelege ukwambilila ulugano ulu lukufuma kwa Kyala, bo mukunnguulila uNtwa gwitũ Jesu Kilisiti. Abapaakisyeye ukuti mwambilile ubũmi bwa bwila na bwila.

²² Mubapaakisyeye abangi aba bikwilaamwa,

²³ bamo mubapokege ku njila jaa kubanyaka mmooto, bamo mubapaakisyeye. Looli mwikeetege, mugukalalilege nalinga mwenda ugu gubiikiigwe amababye ni mbombo imbiibi.

Ƴlwipuuto ulwa nduufyo

²⁴ Kyala jo ujũ ali na maka agaa kubalindilila ukuti mulingasoba, looli ikubatwala umwe nkyeni mbusisya bwake ubukulumba, pamopeene nu lusekelo ulukulumba, kangi kisita mababye gogoosa agaa bubiibi.

²⁵ Umwene jo Kyala mwene, uMpoki gwitũ. Ƴbusisya, ubukulumba, amaka, ubulagili buli nu mwene, ku njila jaa Jesu Kilisiti uNtwa gwitũ, ukufuma lijolo, na ulu, na bwila na bwila. Amen.

Ulwikano Ulupya
Nyakyusa-Ngonde: Ulwikano Ulupya (New
Testament+)

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

14ff4521-53e4-562c-aacb-6f4faf55a6c8